

Fasnacht 2021



Fasnacht 2.1

Zem Covid 19, däm Sauhund, däm bleede
verlier y kei Wort, wott nitt vonem reede.
Aber schloofloos vor Druur, hütt z Nacht im Bett
hany ans Unglugg dänggt, wo dä aagrichtet hett.

Am Mändigmorge kei Menshegewimmel,
keini Ziibesleschwaade, kei Schällegebimmel.
Kei Martinsglöggli wo Vieri schloot,
kei Momänt, wo's Härz still shtoot,
kei Alti, wo uff e Ranze fliegt,
kei Fruscht, well me kalti Finger kriegt.
Am Rhysprung kei Stau, kei Liechtermeer,
bim Gifthüttli kei Druggete, kei Gegeverkeer.
Kei Ruesse und kei Jubiliere in de Gasse.
Nur Dootestilli. Es isch nitt zem Fasse.

Uff em Andreasplatz e unheimligi Rue.
Dr Ängel und d Haseburg: alles zue.
Kei Waggis, kei Zweierli bim Friere
und bim gwunderige Goschdym-Defiliere.
Im Drei Keenig kei Cüpli, bim Eiche kei Wurscht,
und vor em Schnabel kei Bier für dr Durscht.
Kei Scheiaweia uff dr Schlüsselstääge,
kei chaotisch Yschooto im kalte Niiselräge.
Vo dr Schäase keini Dääfi, kei Mimoose.
Dr Spitzbueb kasch nur online loose.

D' Helvetia am Rhy duet s' Gsicht verhülle.
Me ghört dr Leu vo wytem zornig brülle,
und d' Gämse uff em Brunne froggt konschterniert:
wo isch nur my Echo, isch öbbis passiert?
Bym Schoofegg: niemerts usser Rand und Band,
s ganz Glaibasel isch fescht in Corona Hand,
au im Baggestoos gitt's kei Geschunggel.
Dr Münschterplatz lytt still und dunggel,
kei Ladärnepracht, keini Kerzli wo loodere.
Dr Schorsch duet langsam vor sich aane moodere.
Druurig blyybt dr Fäärimaa im Schärme hogge
und studiert s Muschter vo syne Wullesogge.

D' Irländer und d' Brite sin alli verreist,
dr Fischmärt isch menscheleer und verwaist.
Dr Hofnaar zieht e Schnute, dr Ryslaifer isch hei,
dr Copain sufft e Calvados und macht e Schtei.
Dr Glopfgaischt jommeret "Das git mr dr Räscht!",
und die Alte sinn alli scho lang im Näscht.
Dr Unggle Sam muult "Fuck you all, this is so gschisse",
und d' Matrose schreye panisch "Säägel hisse!"
Vor lutter Stress und Wuet ganz wirr im Kopf,
hängt der Ueli schlaff ame Whiskydropf.
"So, mir länggt's", ghörsch dr Luuser schimpfe,
"ych mach d' Retraite und loo my lo impfe."
Es gitt kei Ändstreich und kei Röschtizmorge,
kei Rappliplotsch am Donschtigmorge.
D' Nunne lot e letschte Furz lo faare, denn isch Rue,
und z' Basel zieht me dr schwarzi Vorhang zue.

Scho s' zweit Mol hett me ys d' Fasnacht gschtöle.
Dr Deufel söll das eländ Virus hole!
Loos Digge, ych schwör's, mir wurde di, ooni z flueche
verzwyfflet und stundelang go sueche -
im Schnabel, in dr Harmonie, im Bruune Mutz,
am Spaalebärg und am Leonhardsstutz.
Das z' verspräche fallt ys überhaupt nit schwär,
wenn nur ändlig, ändlig wider Fasnacht wär.

